



partii naleraq

UPA 2017/141-01

25-04-2017

Inissianik attartortitsisarneq pillugu Inatsisartut peqqussutaata allanngortinneqarnera pillugu Inatsisartut inatsisaat nr. xx, xx xxx 2017-imeersoq (Sulisunut inissiat tigusinissamut ukiunik 7-inik maleruagassaqaqarnermut allanngortitsineq).

(Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoq).

Inissianik attartortitsisarneq pillugu Inatsisartut peqqussutaata allanngortinneqarnissaa pillugu Inatsisartut inatsisaattut siunnersuut Partii Naleraq sinnerlugu imannak oqaaseqarfigissuara.

Siullermik inissianik attartortitsisarneq pillugu Inatsisartut peqqussutaata allanngortinneqarnissaa pillugu siorna siunnersuuteqarninni Partiit tamaasa siunnersuummik tapersiisimasut qutsavingaakka, soorunami aamma ineqarnermut attaveqarnermullu Ataatsimiititaliami suleqataasimasut tamaasa ilanngullugit.

Nuannerpoq siunnersuut paasilluarneqarluni maanna atuisunut iluaqutaasussamik sunniuteqartussangormat, tassami pisortat inissiaataanni atorfirmut atatillugu inigisap ukiuni arfineq marlunniik ukiunut tallimanut attartorneqarnerata sivikillisinneqarneratigut atorfillip ukiut tallimat qaanngiunnerisigut inigisaq atorfirmut attuumassutaarullugu kiffaanngissuseqarluni inissiatut naliginnaasumik attartukkatut najungarilertussanngussammagu.

Tamanna soorunami atorfilimmut aamma suliffimmik allamik soqutigisaqarsinnaasumut imaluunniit suliffeqarnerup iluani inuussutissarsiummik allamik aallutaqarusuttumut ineqarnerup tungaatigut pitsaanerumik eqaannerusumillu periarfissaqalissamat.

Partii Naleqqamiit qularinngilarput inatsisartuni partiit tamarmik innuttaasut inuiaqatigiillu tamarmik ineqarnikkut sapinngisamik pitsaanerpaanik atugassaqaqartinneqarnissaat soqutigisarigippit.

Taamaammat ineqarnikkut pisariillisaaneq pitsanngorsaajuarnissarlu pisariaqarluinnartut tamatta ilisimavarput.

Soorunami nalunngilarput inuiaqatigiinni ineqarnerup tungaatigut iluarsisassarpassuit uuma peqqussutip allanngortinnerinnaatigut aaqqinneqarsinnaanngitsut.

Nalunngilarpummi inuiaqatigiinni ineqarnikkut aamma imaannaanngitsunik ajornartorsiuteqarluta, ilaqutariippassuit aamma meerartallit inigisaminniit anisitaasimapput, inuit ilarparujussui angerlarsimaffeqanngillat.

Taamaattumik ineqarnikkut aaqqissuusseqqinnissaq suli pisariaqarpoq, taamaammallu aamma ukioq mannamut aningaasnut inatsisikkut Naalakkersuisut Namminersorlutik Oqartussat inissiaataannik kommuninut akeqanngitsumik tunniussinissaannut atatillugu pilersaarusiornuarnissamut aaqqissuusseqqinnissamullu Partii Naleqqamiit suleqataanissatsinnut periareersimavugut.

Ineqarneq pillugu aaqqissuusseqqinnissarlu pillugit isummersuutunik oqaasissarpassuaqarnaraluartoq manna siunnersuut taperserlugu, suliap aappassanneerseqannginnerani ineqarnermut attaveqatigiinnermullu ataatsimiititaliami suliarineqarnissaa inassutingaarput.